

## HEBERU

Heberu vaḡa-foforina guruḡari

Mai fefa toretorena tarimana ta tu asi ribana. Tari ḡekirani tu Luka na etoreato, tari ḡekirani tu Apolos, o Banabas, o Priskila, o Akwila, o Paulo na etoreato ḡetoni. Ġutuma ḡekirani tu Paulo ḡetoni korana fefa tu Paulo ḡena fefa tore maḡurinaḡi ḡetoreato. Mai fefa tu laḡani 60 ema 70 fakari nuḡanai ta ḡetoreato, mo tu Iesu emaseto murinaḡi.

Mai fefai siri baregori tu karoa 1:3; 4:14-16.

Mai fefa etoreato tarimana ḡena ura baregona tu, 1) Heberu ekalesiari bene kirari, ekalesia maḡurina korikorinaḡi beḡene tanu, a Iuda ḡeri sene taravaturi ema maḡuriri ḡerina tu beḡene raka-veḡita ma ḡeri ai asi ma beḡene ḡenoḡoi-iaḡo, maḡuri vanaḡivanaḡi asi beḡe doḡariani garina (2:1; 6:4-6; 10:26); 2) Iesu Keriso bene vaḡa-foforia, ḡia tu moḡoni Barau vetoḡana korikori ema foforito tanobarai; 3) Barau ḡena Ginitaḡo Variguna Iesu ḡenai emoḡonito moḡa bene vaḡa-fofori ginikaua etato.

Mai fefa tu maiḡesina eboioḡaiato:

1. Vevaḡa-riba-iaḡi guruḡari - karoa 1-10:18
2. Ekalesia tanutanuna maḡuriri - karoa 10:19-13:25

*Barau ḡena guruḡa Natuna ḡenana*

<sup>1</sup> Guinenai, ḡaro vovoka e dabara ḡutumai Barau na peroveta tarimari ḡerina senera evaḡa-guruḡarito. <sup>2</sup> Senaḡi toma, mai ḡaro dokori ai,

tu Natuna ġenana ema vaġa-guruġarato. Barau na dagara mabarari tu Natuna eviniato bene ġaunari. Ema ġia ġenana maki Barau na guba e tanobara eveirito. <sup>3</sup> Ġia tu Barau marevana e mamana baregona evaġa-foforiani, ema ġia tu Barau tauġena kavana. Ġia ġena guruġa seġukana na dagara mabarari eġabi-taġorini. Ġia tauġena na ġera rakava ġurigivaġiri dabarana evei-ġitakauato murinai, Barau Iaru-korokoro aroribanai ea tanu-tarito gubai.

*Barau Natuna tu barego vedaurea, aneru maki evanaġirito*

<sup>4</sup> Barau na Natuna tu etore-varaġeato, aneru evanaġirito. Korana tu arana eviniato maki varaġe lelevaġina, aneru arari evanaġirito. <sup>5</sup> Korana Barau na aneru ta tu asi ekiraiato, ekirato,

“Ġoi tu au Natugu,  
toma au tu ġoi Tamamu ai baiaġo.”  
O maigesi maki asi ma ekiraiato, ekirato,

“Au tu ġia Tamanai baiaġoni,  
ema ġia maki au Natugu ai beiaġoni.”

<sup>6</sup> Ema Barau na Natuna guinena tanobara ġana ma beġori-iaġomaiani nai tu bekirani,  
“Barau ġena aneru mabarami na boġono toma-  
rakariġo vinia.”

<sup>7</sup> Aneru ekiraġirito nai tu ekirato,  
“Barau na ġena aneru eveirito iavara kavana,  
ġena vetuġunaġi tarimari karava emoreni noġa.”

<sup>8</sup> Senaġina Natuna ekiraġiani tu ekirani,  
“Barau o, ġoi ġemu Vere dagina tu betanu-vanaġi  
vanaġini,

ġemu Basileia tu ma iobukaiobukamu ġesi oġori-  
kauani.

<sup>9</sup> Vei-iobukaiobuka tu oura-vinirini,  
ma veiġa rakavari tu asi oura-vinirini.

Moġa lorinai, Barau o,

ġemu Barau na maki karomu fakari ai ġoi eġabi-  
virigimuto,

debamu ai diġa esisiato,

iaku na evaġa-vonumuto.”

<sup>10</sup> Ema ma ekiraiato, ekirato,

“Vere o, tovtovonai tu

ġoi na tanobara oveiato,

ema guba maki ġoi ġimamu veiveina.

<sup>11</sup> Ġia tu beġe korini,

senagi ġoi tu botanuni;

mabarari dabuġa kavana beġe rakavani.

<sup>12</sup> Ġoi na koudi noġa boiokurini,

dabuġa kavana vetoġari beġe irauni,

senagi ġoi vetoġamu tu asi beirauni,

ema ġoi ġemu maġuri laġaniri maki

asi beġe magoni.”

<sup>13</sup> Barau na aneru ta maki asi ekiraiato,

“Aroribagu ai noma tanu,

bene iaġo mo, ġoi ġevetari-vinimuni tarimari ġoi

kwakumu fanakauna dagananai batore-

taririni.”

<sup>14</sup> Aneru mabarari tu vetuġunaġi iaukari moġo,

Barau na etuġurito deikara vevaġa-maġuri beġe

ġabiani tarimari vaġa-kavari ġana.

## 2

*Vevaġa-maġuri baregona*

1 Moġa lorinai kara taseġaġirito guruġari tu tana ġabi-gigitariri, asi namo ġerana beġe rek-warekwani, benamo taiago-viniani gabuna bita leaiani. 2 Korana aneru na ġita senera ġeri ġevari-fiurito guruġari tu moġoni veġata, ma mo guruġa moġeri ġekira-sirivaġi-iaġirito e asi ġekorana-iaġirito tarimari tu ġeri vei-rakava ilailari ai metona ġeġabiato, 3 a ġita tu kamasi bita raga-maġurini, bema mai vevaġa-maġuri baregona bita ġita-ġuiragiiani nai tu? Mai vevaġa-maġuri tu tovotovonai Vereġauka tauġena na evari-fiuato. Moġa murinai tu ġeseġaġiato tarimari na ġai ġema-kiravaramato mo tu moġoni. 4 Barau na maki evaġa-moġoniato vetoġa boruri ai, e nuġa-farevaġi veġari ai, e seġuka veġari boruri dabara iraurauri ai, ema Iauka Veaġa ġena varevare dagarari na. Mo Iauka Veaġa ġena varevare dagarari tu Barau ġena ura lorinai veġabidadama tarimari evinirito.

*Iesu na vevaġa-maġuri gabuna ġana eġori-iaġorani*

5 Mo tanobara beiaġomani ġai na ġakiraġiani tu Barau na dia aneru ġeri veġitaġau gaburenai etoreato. 6 Senaġina Buka Veaġa nuġanai gabu tai tarima ta evarifiuto, ekirato,  
 “Barau o, tarimarima tu dei,  
 be ġoi na otuġamaġi-gwaġiġiani?  
 O Tarimarima Natuna tu dei,  
 be ġoi na oraka-ġitaiani?

7 Ġoi na kota otore-variġoato aneru gabureri ġana;

murinai mareva baregona e vegubakau koronana ġenai otore-kauato,

<sup>8</sup> ema dagara mabarari ġia kwakuna gaburenai otorerito.”

Korana Barau na dagara mabarari tu ġia ġena veġitaġau gaburenai etorerito. Moġoni, Barau na dagara ta tu asi etore-ragakwaneato, ġia ġena veġitaġau gabuna murikanai. Senaġina maitoma dagara mabarari tu dia ġia ġena veġitaġau gaburenai taġitarini. <sup>9</sup> Senaġi Iesu taġitaiani, ġia tu Barau na mo faka kotunai etore-variġoato aneru gabureri ġana, korana Barau ġena varevare-bara ġenana tarimarima mabarari urari ai bene mase. Toma Iesu tu taġitaiani, iatanai Barau na mareva e vegubakau baregona etore-kauato, korana tu midigumidigu ai emaseto.

<sup>10</sup> Dagara mabarari eveirito e eġaunarito Barauna, ġena ura tu Iesu roġo midigumidigu ġenana asi vetoukaunai bene iaġo-guine. Moġa murinai vauro natuna ġutumari ma bene ġori-iaġomari, benamo ġia marevana e mamana baregona beġene ġabia. Barau ġenai dabara roroġotona sebona tu moġa moġo. Korana Iesu tu Barau natuna ġeri vevaġa-maġuri tarimana baregona. <sup>11</sup> Tarimarima evaġa-veaġarini tauna, Iesu, ema Iesu na evaġa-veaġarito tarimari Tamari tu sebona. Moġa lorinai Iesu tu asi emaiakaiani mo evaġa-veaġarito tarimari ekiraġirini ġia tarikakana. <sup>12</sup> Ġia na Barau ekiraiani, ekirani, “Ġoi aramu tu au tarikakagu ġeri ai bakiraġi-foforiani; ekalesia nuġanai ġoi mari ai bavonevone-raġemuni.”

<sup>13</sup> Ma ekirato,

“Barau ġenai baveġabidadamani.”

Ema ma ekirato maki,

“Au tu maiġegu Barau na eviniguto doġorona natuna ġesi.”

<sup>14</sup> Korana Barau natuna mabarari tu ma viriġori e ma rarari nai, ġia tauġena maki ġia ilailari ai eiaġoto. Moġesi eveito korana tu, ġena mase ġenana mase seġukana eġabi-taġoani tarimana, Diabolo, bene vaġa-rakavaia ġana.

<sup>15</sup> Ema tarimarima deikara ġeri maġuri nuġanai mase garina na eġuġuvirito bene vaġa-maġuriri ġana. <sup>16</sup> Moġoni, Iesu na tu dia aneru evaġa-kavarito, senaġi Aberahamo besena. <sup>17</sup> Moġa

lorinai Barau na Iesu tu dabara mabarari ai tarina doġoro ilailari ai eveirito. Korana mo dabarai vau vevetuġaġwa e vetuġamaġikau Rubu Veaġa verena baregonai beiaġoni. Ema Barau vetuġunaġina beiaġo-vinini, tarimarima ġeri rakava na bene voi-vaġiri ġana. <sup>18</sup> Korana Iesu tauġena na veribaġani midigumidiguna mamina eġabiato, toma kamara deikara veribaġani beġoitaġoni nai tu bevaġa-kavaiani riba.

### 3

*Iesu ġena seġuka na Mose ġena seġuka evanaġiato*

<sup>1</sup> Moġa lorinai, tarikakagu veaġami, ġomi tu Barau na ekeamito guba na. Ġemi tuġamaġi boġono tore-gwaġiġia Iesu ġenai. Ġia tu Barau na etuġuato Rubu Veaġa verena barana. Ġita na tu

ġia takiraġi-foforiani. <sup>2</sup> Iesu tu Barau na evaġa-ruġaiato Rubu Veaġa verena. Ema ġia tu ma ġena vetuġamaġikau Barau ġenai, ilailana Mose ma ġena vetuġamaġikau Barau ġena numai kavana. <sup>3</sup> Numa eragaiani tarimana tu ġegubakau-baregoani, a eveiani numana tu ġegubakau-keiani. Moġesi kavana Barau na Iesu tu mareva baregona eviniato, Mose na eġabiato marevana evanaġiato. <sup>4</sup> Numa mabarari tu ma ragaragari tarimari, senaġina dagara mabarari veiveiri tu Barau ġereġana. <sup>5</sup> Mose tu vetuġunaġi-iaġovini tarimana, ġia ma ġena vetuġamaġikau Barau ġena numai. Ema ġena ġauvei tu ġoirai Barau na kara bekiraġirini guruġari ekiraġi-foforirito-ġoi. <sup>6</sup> Senaġina Keriso, Barau Natuna, tu Barau ġena numa eġita-ġauani. Ġita tu ġia ġena numa, bema ma kokorera e ma iakura ġesi taveiavi-iaġiani tuġamaġikaunai bita veġabi-gwaġiġini beiaġoni mo magona.

*Barau ġena tarimarima ġeri iaġaraġi*

<sup>7</sup> Moġa lorinai Iauka Veaġa ekirani kavana bitana vei, maiġesi ekirani,  
 “Toma bema Barau garona boġo seġaġiani nai tu,  
<sup>8</sup> nuġami asi boġono vaġa-gwaġiġi foroforori,  
 senemi tanobara fakanai veribaġani ġaronai  
 ġeseġaforeto kavana.  
<sup>9</sup> Oba, tamam na laġani gabana vasivasi (40)  
 tanobara fakanai ġegu ġauvei ġeġitaiato,  
 senaġina ġeribaġaniguto e ġevaġa-uraguto.  
<sup>10</sup> Moġa lorinai mo bese abaru-vinirito,  
 benamo akirato, ‘Ġia nuġari tu vanaġivanaġi au  
 ġeguna ġeveġitani,

ema au ġegu veiġa maki asi ġeribarini.’

<sup>11</sup> Moġa lorinai ma baruġu ġesi aguruġa-foforito, ‘Ġia au ġegu iaġaraġi ai tu asi beġe raka-toġani.’ ”

<sup>12</sup> Tarikakagu mabarami, boġono venari. Asi namo tarikaka ta ġomi fakami ai loruna ġutunai vei-rakava betanuni, ema Barau ġena guruġa asi bevaġa-moġoniani, benamo maġuri Barauna ġenana beraka-veġitani. <sup>13</sup> Toma mai ġaro maiġa Barau ekirani, “Tomaġaro” etoni ġiranai, karomi tata ġesi boġono velaunaġi, be vei-rakava ġena ġofaġofa na ta nuġamu asi bene vaġa-gwaġiġia.

<sup>14</sup> Ġita tu Keriso ġesi tasebonato, bema tovo-tovonai taġabi-raġeato veġabidadamana moġa bita ġabitari-gwaġiġiani beiaġoni mo magona.

<sup>15</sup> Buka Veaġa ekirani kavana,

“Tomaġaro ai bema garona

boġo seġaġiani nai,

nuġami asi boġono vaġa-gwaġiġiri,

guinenai ġomi senemi seġafore ai ġeveito kavana.”

<sup>16</sup> Dei na tu Barau garona ġeseġaġiato, senaġi ġena guruġa ġekira-fitoġarito, benamo ġevaġa-baruato? Mo tu Mose na Aigupito na eġori-rosirito tarimari mabarari, ene? <sup>17</sup> Ema deikarari tu Barau na mo laġani gabana vasivasi (40) nuġanai ebaru-vinirito? Tarimari tu moġeri, rakava ġeveito, benamo tano fakanai ġeketoto, benamo ġemaseto, ene? <sup>18</sup> Ema Barau na tu deikarari ekirarito, ekirato, “Au ġegu iaġaraġi gabunai tu asi beġe raka-toġani.” Ġeseġaforeto tarimari ekirarito, ene? <sup>19</sup> Moġa lorinai ġita taribani, ġia



tu asi ġeraka-toġato, korana Barau asi ġevaġa-moġoniato-ġoi nai.

## 4

<sup>1</sup> Barau ġena iaġaraġi ai bita raka-toġani guruġatorena tu roġo eruġa-taġoni. Moġa lorinai bitana venari, ġita fakarai ta mo iaġaraġi ai asi beraka-toġani garina. <sup>2</sup> Korana mo Vari Namona ġita ġera ġeġobata-iaġiato tu Isaraela tarimari ġeri maki ġeġobata-iaġiato. Senaġi mo guruġa ġeseġaġirito ġerina namo ta asi ġeġoitaġoato, korana tu ġeseġaġirito moġo, ma asi ġevaġa-moġonirito.

<sup>3</sup> Senaġi ġita Barau tavaġa-moġoniani tarimara tu, mo iaġaraġi ai bita raka-toġani ġena guruġa ilailanai, ekirato, “Au ġegu baru ai kiraġitore guruġana gwaġiġina akiraġi-foforiato, akirato,

‘Au ġegu iaġaraġi ai tu asi beġe raka-toġani.’ ”

Moġoni, Barau tu moġesi ekirato, senaġina ġia na tanobara eveiato nai, ġena ġauvei mabarari tu varau evaġa-koririto. <sup>4</sup> Gabu tai Buka Veaġa nuġanai ġaro vaġa-imaima ruaruana (7) ekiraġiato nai tu, maiġesina ekirani, “Ġaro vaġa-imaima ruaruana (7) Barau tu ġena ġauvei mabarari ġerina eiaġaraġito.” <sup>5</sup> Ema mai vau bita kiraġia gabunai maki ekirato, “Ġia au ġegu iaġaraġi ai tu asi beġe raka-toġani.”

<sup>6</sup> Senaġina tari mo iaġaraġi ai beġe raka-toġani guruġatorena tu roġo eruġani gabunai. Ma Isaraela tarimari, Vari Namona ġeseġaġi-guineato tarimari, tu mo iaġaraġi ai asi ġeraka-toġato,

korana tu ġeseġaforeto nai. <sup>7</sup> Moġa lorinai Barau na ġaro ta ma eġabi-viriġiato, “Tomaġaro” eki-raġiato. Ma laġani vovoka ġekorito murinai, Barau, Davida ġenana maiġesi eguruġato, ekirato, “Toma, bema Barau garona

boġo seġaġiani nai,  
nuġami asi boġono vaġa-gwaġiġiri.”

<sup>8</sup> Bema Iosua na iaġaraġi bere viniri, Barau na moġa murinai iaġaraġi ġarona ta tu asi ma bere kiraġia. <sup>9</sup> Moġa lorinai Barau ġena tari-marima ġeri iaġaraġi tu roġo ġoirai eruġa-taġoni. <sup>10</sup> Korana Barau ġena iaġaraġi ai eraka-toġani tarimana tu ġena ġauvei na eiaġaraġini, ilailana Barau ġena ġauvei na eiaġaraġito kavana. <sup>11</sup> Moġa lorinai sikokore, Barau ġena iaġaraġi ai tana raka-toġa uranai. Ma ġita fakarai ta asi bene keto, ġuinenai ġeseġaforeto tarimari kavari.

<sup>12</sup> Barau ġena guruġa tu maġuri e ma seġukana. Matana maki raga-rakava, vetari baġana ta matana ruarua maki evanaġiato, erakatoġa-korikorini maġuri ma iauka vekaravarina, ema turiġa komukomuri ruarua ġeraga-sebonato vekaravarina. Tarima loruna ġutuna ġena ura e tuġamaġi maki eriba-viriġiani. <sup>13</sup> Barau na eveirito dagarari mabarari tu ta asi vekuretoġa ġia matanai. Ema ġia ġoiranai ġita mabarara ġera maġuri bita vari-fiurini.

### *Iesu Rubu Veaġa verena barego vedaureana*

<sup>14</sup> Barau Natuna Iesu tu ġita ġera Rubu Veaġa verena barego vedaureana; ġia tu guba erakavanaġirito. Moġa lorinai ġera veġabidadamai

tana veḡabi-gwaḡiḡi. Mo tu ḡita na takiraḡi-foforiani veḡabidadamana. <sup>15</sup> Ḡita ḡera Rubu Veāḡa verena baregona tu ḡita ḡera moiramoirā ḡia na maki emami-raḡirini. Korana tu ḡia maki ḡenai veribaḡani irauirau mabarari ḡefoforito ḡita ḡerai kavana. Senaḡi ḡia tu asi evei-rakavato. <sup>16</sup> Moḡa lorinai ma kokorera ḡesi Barau ḡena namo e varevare-bara terona ḡana siraka-kavi-iaḡo. Monai Barau ḡena vevetuḡaḡwa bitana ḡabia, ema ḡena varevare-bara tana ḡoitaḡoa, be bita ura-viniani nai, bene vaḡa-kavara.

## 5

<sup>1</sup> Rubu Veāḡa vereri baregori mabarari tu tari-marima fakari na Barau na eḡabi-viriḡirito, benamo evaḡa-ruḡarito, tarimarima arari ai Barau ḡena ḡauvei beḡene veia ḡana. Ḡia ḡeri ḡauvei tu tarimarima ḡeri rakava voi-vaḡiri ḡana varevare dagarari Barau beḡene vinia ema boromakau, mamoe, e manu beḡene vaḡiri, benamo beḡene gaburi, Barau na bonari bene noḡori ḡana. <sup>2</sup> Rubu Veāḡa verena baregona tauḡena maki ma ḡena moira gaburi, naima ḡia na asi ribari tarimari ema Barau ḡena dabara na ḡeraka-veḡitani tarimari bevetuḡa-ḡwarini riba. <sup>3</sup> Ḡia tauḡena maki ma ḡena moira lorinai, ḡia na rakava voi-vaḡiri varevareri tu ḡia ḡena evinini, ema tarimarima ḡeri maki evinini.

<sup>4</sup> Rubu Veāḡa verena baregona dagina eḡabini tarimana tu arana barego. Tarima ta na mai ginitaḡo ḡauveina tauḡena na asi beḡabi-kavaiani,

senāgi ġia tu Barau na bene keaia vau, vaġa-ilailana Arona ekeaiato kavana.

<sup>5</sup> Keriso maki moġesi, dia tauġena eveġabivarāġeto Rubu Veāġa verena baregonai eve-toreto, senāġina Barau na evaġa-ruġaiato, ekiraiato, ekirato,

“Ġoi tu au Natugu,  
toma au tu ġoi Tamamu ai baiaġo.”

<sup>6</sup> Gabu tai maki ekirani,  
“Ġoi tu Rubu Veāġa verenai  
botanu-vanaġi vanaġini  
Melkisedek kavana.”

<sup>7</sup> Iesu tanobarai etanuto-ġoi ġarori ai tu ma taġi-koġokoġona ema matana ma nanuri ġesi Barau ġenai eġuriġurito-ġoi, ema enoġi-raġeto-ġoi. Korana tu Barau na ġereġana na moġo mase ġenana bevaġa-maġuriani. Barau na eseġaġiato, korana tu ma vegubakauna ġesi Barau garina eveito-ġoi nai. <sup>8</sup> Ġia tu Barau Natuna, senāgi ġena midigumidigu na vau seġaġi dabarana eribaiato. <sup>9</sup> Enamo-vedaureato murinai vau, ġia beġe seġaġi-viniani tarimari mabarari ġeri maġuri vanaġivanaġi vaġa-ġorana tarimanai eiaġoto. <sup>10</sup> Ema Barau na evaġa-ruġaiato Rubu Veāġa verena baregona Melkisedek kavana.

### *Asi boġono mero-kaukau*

<sup>11</sup> Ġia varina tu vovoka bita kiraġirini, senāġina moġeri kiraġi-viriġiviriġiri tu gwaġiġi, korana ġomi tu asi ġotuġamaġi-faka ġarimoġini. <sup>12</sup> Mai nega mainai ġomi tu vevaġa-riba tarimami ai ġoro iaġo, be ġoro vevaġa-riba-ġoi. Senāġina ġomi tu roġo ġourani ta na Barau ġena guruġa moġoniri korari

na ma bene vaġa-ribami ġotoni. Ġomi tu roġo lata ġourani, ġaniġani gwaġiġiri tu asiġina. <sup>13</sup> Deikara lata roġo eruruni tu roġo mero keina. Ġia tu veiġa iobukaiobukari ema veiġa asi roroġotori vetoġari tu roġo asi ribana. <sup>14</sup> A ġaniġani gwaġiġiri tu tarima baregori ġari. Ġia na tu ġeġauvei-iaġi vanaġivanaġirini. Ġeġauvei-iaġirini ġarori ai tu tauġeri maki ġevevaġa-ribani namo e rakava vetoġari beġene ġita-leari ġana.

## 6

<sup>1</sup> Moġa lorinai namona tu Keriso ġena vevaġa-riba guruġari tovotovonai riba guineri ġeġorani dagarari tu si-iaġuiri. Benamo ġia ġena vevaġa-riba baregori ġana si-iaġo. Tovotovonai riba guineri ġeġorani dagarari moġo asi bitana vevaġa-riba-iaġi ġenoġoi-ġenoġoiri. Mo tu veirakava ġerina tuġamaġi-kure ma raka-kure e Barau ġenai veġabidadama. <sup>2</sup> Babatiso vevaġa-ribari e ġima tarima iatari ai torekau, mase na variġisi-ġenoġoi e vevaġa-roroġoto vanaġivanaġi. <sup>3</sup> Moġa tu bita veiani bema Barau na bevaġa-moġoniani nai.

<sup>4</sup> Bema tarima ta ġena veġabidadama beragakwaneani tu, kamara dabarai ma bevetuġamaġi-kureni? Ġia nuġana tu evaġa-mamaiato, ema guba na eiaġomato varevarena emami-tovoato, ema Iauka Veaġa maki eġabiato. <sup>5</sup> Ema Barau ġena guruġa namona edoġariato e vau ma beiaġomani tanobarana seġukari maki emamirito. <sup>6</sup> Bema ġia veġabidadama na ma beketo-veġitani, ġia tu Barau Natuna ma evaġa-satauro ġenoġoiani, ema ġutuma barai ma etore-rosiani

e evaḡa-maiakaiani. Ġia ma novaḡa-vetuḡamaḡi-kurea ḡana tu asi dabarana ta.

<sup>7</sup> Ġaro vovoka ḡura eraguni, benamo tano na mo nanu erimaiani. Benamo bema mo tano iatanai ḡevaroni tarimari ḡari ḡaniḡani namori bevaḡa-ḡorarini nai tu, Barau na mo tano namo beviniani. <sup>8</sup> Senaḡina ḡau ma giniri ema ḡauḡa ma ḡiniḡiniri evaḡa-ḡararini tanona tu asi ḡena namo; Barau na mo tano bekiraḡiani tu tano rakavana, ema dokonai tu begabuani.

<sup>9</sup> Ġatagu mabarami, moḡoni, maiḡesina ḡavaḡa-guruḡa ḡwaḡiḡimini, senaḡina ḡatuḡamaḡi-gwaḡiḡini, ḡomi tu namo baregona ema vevaḡa-maḡuri boḡoa ḡoitaḡoani. <sup>10</sup> Barau ḡena veiḡa tu asi ḡeḡeva. Barau ḡemi ḡauvei ema ḡia arana ḡoura-viniani nai, ḡena tarimarima ḡovaḡa-kavarito ema initoma roḡo ḡovaḡa-kavarini tu asi betuḡa-rekwarini. <sup>11</sup> Ġai ḡema ura baregona tu ḡomi tata maniḡesi moḡo boḡono ḡauvei-kokore-iaḡo, ḡemi tuḡamaḡikau beḡenea moḡoni bene iaḡo mo dokonai. <sup>12</sup> Be asi beḡene ḡubulefimi, senaḡina mo tarimarima ḡeri veḡabidadama e ḡeri vevaḡa-gwaḡiḡi ḡerina mo kiraḡitore ḡeḡabiani, boḡono tovotovori.

### *Barau ḡena kiraḡitore*

<sup>13</sup> Barau ḡena kiraḡitore guruḡana Aberahamo ḡenai eveiato tu tauḡena aranaḡi eguruḡa-toreto, korana tu tarima ta ma asi varaḡe ḡia iatanai, aranaḡi beguruḡa-toreni lorinaḡi. <sup>14</sup> Ekirato, “Moḡoni, ḡoi tu bavaḡa-namomuni ema besemu ḡutama bavanimuni.” <sup>15</sup> Benamo Aberahamo

evevaḡa-gwaḡiḡito, asi eḡubulefito mo Barau na ekiraḡi-torerito dagarari ḡenai ḡefoforito.

<sup>16</sup> Tarimarima guruḡatore gwaḡiḡiri mabarari ḡeveini nai tu, tarima baregona ta ḡia iatarāḡeri ai aranai ḡeguruḡa-toreni. Monana mo guruḡa-tore guruḡana gwaḡiḡina evaḡa-moḡoniani, benamo veḡareveḡare guruḡari mabarari elauḡaurini.

<sup>17</sup> Guinenai Barau ḡena kiraḡitore tu guruḡatore guruḡana gwaḡiḡinai eveiato. Korana ḡia ḡena ura ḡia na kiraḡitore beḡe ḡaunaiani tarimari beḡene riba-ginikau, ḡia ḡena kiraḡitore tu asi bevekefoni.

<sup>18</sup> Mo guruḡatore ruarua tu beḡe tanuni, asi beḡe vekefoni. Ema mo dagara ruarua ḡerina ḡita taribani, Barau tu asi beḡofaḡofani riba. Be ḡita deidei rakava ḡenana taraga-veḡitato, benamo Barau ḡenai taiāḡomato tarimara tana kokore-korikorī, be mo tuḡamaḡikau ḡoirarai eruḡa-taḡoni tana ḡabia. <sup>19</sup> Mo tuḡamaḡikau taḡabiato tu ḡita ḡera maḡuri eḡabi-tariani dagarana. Mai tuḡamaḡikau tu moḡonina e asi eirauni. Ḡia tu vekouḡau dabuḡana na murina ḡana eraka-toḡani, eiaḡoni mo, veaḡa lelevaḡi daiḡutuna nuḡana ḡana.

<sup>20</sup> Mo ḡana tu Iesu eiaḡo-guineto ḡita bene vaḡa-maḡurira uranai. Ḡia tu Melkisedek ḡena dabarai Rubu Veaḡa verena baregonai betanu-vanaḡi vanaḡini.

## 7

### *Melkisedek tu Rubu Veāḡa verena baregona*

<sup>1</sup> Mai Melkisedek tu Salem vanuḡa barana verena, ema ḡia tu Iaru-korokoro Barauna ḡena Rubu

Veāga verena. Ĝia na Aberahamo edoĝariato, vanuĝa barari ĝeri vere baregori o kini tari vetari ai evaĝirito, benamo eĝenoĝoito-ĝoi nuĝanai, Aberahamo evaĝa-namoato. <sup>2</sup> Ema Aberahamo na vetari ai eĝabirito farefareri, karava gabanana (10) eveirito, benamo karava ta Melkisedek eviniato. Melkisedek arana anina giniginena tu “Veĝa Iobukaiobuka Verena”, ma arana ta tu “Salem Verena”, moĝa anina tu “Maino Verena”. <sup>3</sup> Ĝia asi tamana, asi sinana, asi besena ta, ema ĝena maĝuri evesinato ĝarona e ĝena maĝuri emagoto ĝarona maki asiĝina. Ĝia tu Barau Natuna kavana etanuni, Rubu Veāga verena vanaĝivanaĝi.

<sup>4</sup> Melkisedek ĝoĝitaia, ĝia tu tarima arana barego lelevaĝi, korana Aberahamo tu senera baregona na maki vetari ai eĝabirito farefareri karava gabanana (10) ĝerina ta ĝia eviniato. <sup>5</sup> Taravatu ekirani, Levi besena Rubu Veāga verena dagina beĝe ĝabiani tarimari tu karava gabanana ĝerina ta beĝene gogo Isaraela tarimari ĝerina, mo tu tarikaka ĝerina. Moĝoni, tarikakari maki Aberahamo ĝena bese tarimari, senaĝina ĝia ĝerina beĝene gogo. <sup>6</sup> Melkisedek senena tu dia Levi ĝenana eiaĝomato, senaĝina Aberahamo ĝenana karava ta eĝabiato. Ma ĝia na Barau ĝena kiraĝitore eĝabiato tarimana evaĝa-namoato. <sup>7</sup> Asi bita daradara-iaĝiani, tarima baregona na tarima keina vevaĝa-namo eviniani. <sup>8</sup> Levi senena, karava gabanana ĝerina ta ĝeĝabiato doĝorori, tu ma ĝemaseto-ĝoi. A Melkisedek na maki karava ta eĝabiato, senaĝi



ġia tu Buka Veāġa na ekiraġiani asi emaseto. <sup>9</sup> Benamo maiġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

<sup>10</sup> Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

### *Iesu tu Melkisedek kavana*

<sup>11</sup> Guinenai Barau na Isaraela tarimari taravatu evinirito. Mo taravatu ekirani, Levi besena na ginitaġo veaġa ġauveina beġene veia. Senaġi bema Levi besena ġeri Rubu Veāġa verena ġenana e ġeri ġauvei seġukana na mo namo vedaurea beġere ġabia nai tu, kara dainai Barau tu ma ekirato, Rubu Veāġa verena ta ma betuġuani Melkisedek ilailanai, ma dia Arona kavana? <sup>12</sup> Korana bema ginitaġo ġauveina ġeveiani tarimari ġeri doġoro ġesenisito nai tu, taravatu maki besenisini. <sup>13</sup> Korana Iesu mai takiraġiani tarimana tu irau doġoro. Ġia ġena doġoro tarimana ta fata veaġana iatanai ginitaġo ġauveina asi eveito. <sup>14</sup> Korana ribara, ġita ġera Vereġauka tu Iuda besena na emaġurito. Ma Mose na Rubu Veāġa vereri ekiraġirito-ġoi nai tu, Iuda doġorona tu asi ekiraġiato.

<sup>15</sup> Ema kara bita kiraġia toma tu bita ġitafakaginikauani, korana Rubu Veāġa verena ta ma befofori Melkisedek kavana. <sup>16</sup> Ġia tu dia senena kavari, taravatu seġukanai Rubu Veāġa verenai eiaġoto, senaġina maġuri vanaġivanaġi

ġenana eiaġomani seġukana na Rubu Veaġa verenai eiaġoto. <sup>17</sup> Korana Barau na maiġesi ekiraiato, ekirato,

“Ġoi tu Rubu Veaġa verenai botanu-vanaġi vanaġini Melkisedek kavana.”

<sup>18</sup> Mo taravatu guinena tu etore-veġitaiato, korana ġia tu asi seġukana ema asi bevevaġa-maġurini riba. <sup>19</sup> Korana Mose ġena taravatu na dagara ta tu asi evaġa-namo vedaureaiato. Moġesina naima Barau na tuġamaġikau lagilagina ta ma etore-rosiato, moġa ġenana ġita Barau sevina ġana bita raka-kavini.

<sup>20</sup> Barau na Iesu tu guruġatore guruġana gwaġiġina eveiatio vau, Rubu Veaġa verenai etoreato! A Rubu Veaġa vereri mabarari ġeri ai tu guruġatore ta asi eveiatio. <sup>21</sup> Senaġi Iesu Rubu Veaġa verenai eiaġoto tu Barau na guruġatore gwaġiġina eveiatio vau. Barau na maiġesi ekiraiato,

“Vereġauka tu eguruġa-foforito

ma ġena tuġamaġi asi ma bekefoani:

‘Ġoi tu Rubu Veaġa verenai botanu-vanaġi vanaġini.’”

<sup>22</sup> Mai guruġatore guruġa gwaġiġina lorinai, Iesu tu ginitaġo variġuna ma namona korikori vaġa-moġoninai eiaġoto.

<sup>23</sup> Guinenai Rubu Veaġa vereri tu vovoka, korana tu ġemaseto-ġoi, be ta Rubu Veaġa verenai asi etanu-rovaġito. <sup>24</sup> A Iesu tu etanu-vanaġi vanaġini lorinai, ġia tu Rubu Veaġa verenai betanu-rovaġini. <sup>25</sup> Moġa lorinai deikara

ġia ġenana Barau ġenai beġe iaġoni tu bevaġa-  
maġuririni riba. Korana Iesu tu ġia urari ai Barau  
ġenai bene ġauġau ġana etanu-vanaġi vanaġini.

<sup>26</sup> Maiġesi Rubu Veaġa verena baregona na  
ġita ġera ura dagarari evinirani. Ġia tu veaġa,  
asi ġena vei-rakava, vetoukau ta ġenai asiġina,  
namo vedaurea; ġia tu vei-rakava tarimari ka-  
vana asiġi. Ma Barau na guba tuġuna koriko-  
rinai ea toreato. <sup>27</sup> Ġia tu dia guinenai Rubu  
Veaġa vereri baregori kavana, ġaro korikoriri ai  
varevare dagarari bevinini. Guine tu ġia ġena  
vei-rakava Barau na bene tuġamaġi-fitoġari ġana  
evinito, ma moġa murinai tu tarimarima ġeri  
rakava Barau na bene tuġamaġi-fitoġari ġana. Ġia  
tu vaġa-sebona moġo tarimarima ġeri vei-rakava  
ġana ginitaġo varevarena eviniato. Moġa tu ġia  
tauġena ginitaġo varevarenai eiaġoto, benamo  
Barau ġenai evevini-raġeto. <sup>28</sup> Mose ġena tara-  
vatu na tu ma ġeri moira tarimari Rubu Veaġa  
verena baregonai etorerito-ġoi. Senaġina Barau  
ġena guruġatore guruġana gwaġiġina, Mose ġena  
taravatu murinai ema foforito dagarana, na tu  
Barau Natuna evaġa-ruġaiato. Ġia tu Barau na  
evaġa-namo vedaureaiato, ma namo vedaurea  
betanu-vanaġi vanaġini.

## 8

### *Iesu tu ġita ġera Rubu Veaġa verena baregona*

<sup>1</sup> Ġai na kara ġakiraġiani tu maiġa. Ġita tu ma  
ġera Rubu Veaġa verena baregona. Ġia tu gubai  
Iaru-korokoro Barauna ġena terona aroribanai  
etanu-tarito. <sup>2</sup> Barau ġena veaġa gabuna nuġanai

eġauveini. Mo tu farai rubuna korikori Vereġauka na eragaiato, dia tarimarima na ġeragaiato.

<sup>3</sup> Rubu Veāġa vereri baregori mabarari tu ġevaġa-ruġarito, varevare dagarari ema boro-makau, mamoe, manu beġene vini ġana. Moġa lorinai mai Rubu Veāġa verena baregona, Keriso, maki ma ġena dagara tari, bene vini ġana.

<sup>4</sup> Bema ġia tanobarai bere tanu tu, Rubu Veāġa verenai asi bere iaġo, korana tu maiġa, Rubu Veāġa vereri tu varau ġetorerito maiġeri, varevare dagarari ġevini-tanuni, Iuda ġeri taravatu ekiraġiato ilailanai.

<sup>5</sup> Ġia varevare dagarari mainai veāġa lelevaġi daiġutunai ġevinini tu, gubai mo veāġa lelevaġi daiġutuna kavana e vetoġana moġo. Moġesina nai Barau na Mose toma-rakariġo ġana farai rubuna bene ragaia ġana, naima ekira-toreġauato, ekirato, “Bono ġitaia, dagara mabarari boveirini nai tu, ġoro ai avaġa-ġitamuto ilailanai moġo bono veiri.”

<sup>6</sup> Senaġina toma Iesu na ginitaġo varevareri vini-toreġau veiġana guinenai Rubu Veāġa vereri ġeri ġauvei evanaġiato. Korana Barau ġena kiraġitore variġunai Iesu tu Barau e tarimarima vekaravari ai eruġani, ginitaġo variġuna bene vaġa-seġukaia ġana, ma mai ginitaġo na mo ginitaġo guinena seġukana evanaġiani. Ema Barau ġena kiraġitore variġuna na mo ginitaġo guinena kiraġitorena maki evanaġiato.

<sup>7</sup> Bema mo ginitaġo guinena asi ġena rakava tu, Barau na ginitaġo variġuna ta asi ma bere kiraġia. <sup>8</sup> Senaġina Barau na tarimarima ġeri ai rakava eġoitaġoto naima ekirato,

“Vereġauka eguruġa-foforini,

‘Boĝono seĝaĝi, ĝaro ta mani eiaĝomani,  
 au na ginitaĝo variĝuna ta ma haveiani,  
 Isaraela besena e Iuda besena ĝeri.

<sup>9</sup> 1 Mai ginitaĝo tu dia guinenai ĝia seneri ĝeri  
 aveiato moĝa kavana.

Dia mo ĝaro ai ĝimari ai aĝabito,  
 benamo Aigupito na aĝori-rosirito ginitaĝona ka-  
 vana.

Korana ĝia tu au ĝegu ginitaĝo ĝenai  
 asi ĝevetuĝamaĝikauni naima,  
 au na araga-kwanerito,’

Vereĝauka tu moĝesina eguruĝani.

<sup>10</sup> Vereĝauka ma ekirani,

‘Ĝoira ĝarori ai au na mai ginitaĝo Isaraela besena  
 ĝeri ma haveiani:

Au ĝegu taravatu ĝia debari ai batore-toĝarini  
 ema ĝia nuĝari ai batorerini.

Au tu ĝia ĝeri Barau ai baiaĝoni ema ĝia maki au  
 ĝegu tarimarimai beĝe iaĝoni.

<sup>11</sup> Tarima ta na sevinai etanuni tarimana asi ma  
 bevaĝa-ribaiani,

ema tarima ta tarikakana asi bekiraiani,

‘Vereĝauka noribaia!’

Korana mabarari na beĝe ribaguni,  
 misina na beiaĝoni mo baregona.

<sup>12</sup> Ĝeri kira-sirivaĝi batuĝamaĝi-fitoĝarini,  
 ema ĝeri rakava mabarari asi ma  
 batuĝamaĝirini.’”

<sup>13</sup> Barau na mai ginitaĝo maiĝa ekiraĝiani,  
 “ginitaĝo variĝuna” etoni nai tu, ĝia na mo gini-  
 taĝo tovotovonai moĝa tu guinena na ekiraĝiani.  
 Ma kara eguinenani e erakavani tu asikauna  
 berekwarekwani.

## 9

<sup>1</sup> Ginitaḡo guinena tu ma ḡena taravatu misimisiri toma-rakariḡo ḡana, ema ma ḡena gabu veaḡana maki. Mo gabu veaḡana tu tanobarai etanuni dagarana. <sup>2</sup> Barau toma-rakariḡona ḡana farai rubuna ta ḡeragaiato. Mo farai rubuna nuḡanai daiḡutu giniguinena tu Veaḡa Gabuna ḡetato. Ġia nuḡanai tu lamefa torekauna dagarana, teibolo e Barau ḡeviniato berediri. <sup>3</sup> Kouḡau dabuḡana vaḡa-ruaruana murinai tu daiḡutu ta maia. Moḡa tu Veaḡa Lelevaḡi Gabuna ḡetato. <sup>4</sup> Ġia nuḡanai tu golo fatana, goḡu ma bonana iatanai beḡene vei ḡana, ema Kiraḡitore Mauḡana; ḡia murikana mabarana tu golo na ḡeveiato. Ma mauḡa nuḡanai tu golo ḡurona ta, nuḡana ma manana e Arona ḡena togoi, egarakauto dagarana, ema fore ruarua Barau na iatari ai taravatu etoreto foreri. <sup>5</sup> Mo mauḡa iatanai tu kerubi ruarua ḡevaḡa-ruḡa veḡoirarito. Mo kerubi tu ḡau garagarari, vetoḡari tu aneru kavari. Ta tavi ta dudu ai ḡevaḡa-ruḡaiato, ma ta maki tavi ta dudu ai, ma faneri ḡekeorito, benamo rakava voivaḡiri gabuna ḡegoru-tariato. Mo kerubi ruarua na tu Barau ḡena mareva baregona ḡekiraḡiani. Senaḡi maiḡeri dagara misikoseri mabarari tu toma asi baḡa kiraḡirini.

<sup>6</sup> Dagara mabarari moḡesi ḡeveirito murinai, Rubu Veaḡa vereri ḡaro vanaḡivanaḡi daiḡutu giniguinena nuḡanai ḡeraka-toḡato-ḡoi, benamo ḡeri ḡauvei ḡeveirito-ḡoi. <sup>7</sup> Senaḡi rubu verena baregona ḡereḡana moḡo laḡani ta nuḡanai vaḡa-sebona daiḡutu vaḡa-ruaruana nuḡanai eraka-

toġato-ġoi. Ġena rakatoġa ġarori mabarari ai tu rara maki eġabi-taġoato-ġoi. Mo rara ġia na tu rakava tuġamaġi-fitoġari ġana ginitaġo dagarana i evaġa-iaġoato-ġoi. Guine tu ġia ġena rakava ġana evinito-ġoi ema murina i tu tarimarima ġeri rakava ġana. Mo rakava tu asi ribari nai ġeveirito-ġoi rakavari. <sup>8</sup> Iauka Veaġa na maġeri veiaġa mabarari ġerina ġita tu maġesina evaġa-guruġarani: Bema Barau toma-rakariġona ġana farai rubuna giniguinena roġo eruġa-taġoni nai tu, Veaġa Lelevaġi Gabuna rakatoġa dabarana tu roġosi roġo bene vekeo. <sup>9</sup> Mo farai rubuna tu toma mai negai kara beġe ġorani evaġa-foforiani. Mai farai rubuna nuġana i varevare dagarari e ginitaġo dagarari vaġa-ilailana boromakau, mamoe, manu Barau ġeviniato-ġoi dagarari mabarari na ġetoma-rakariġoto-ġoi tari-mari nuġari asi ilaila beġe iarevarini. <sup>10</sup> Korana mo Barau ġeviniato-ġoi dagarari tu ġaniġani e niuniu dagarari, ema tarima beġene iareva ġana veġuriġi maġuriri irauirau. Mai tu mabarari tauġani taravaturi moġo. Barau na tarimarima evinirito beġene korana-iaġiri, bene iaġo mo, ġaro ta, dabara variġuna bevaġa-ruġaiani.

### *Iesu rarana*

<sup>11</sup> Senaġi Keriso tu dagara namori ġema-foforito ġeri Rubu Veaġa verena baregona. Ġia tu farai rubuna barana e namo vedaureana nuġana na eraka-toġato. Dia tarimarima na ġeragaia to farai rubuna, korana mo farai rubuna tu dia mai tanobara dagarana. <sup>12</sup> Keriso tu dia nanigosi o boromakau naturi rarari seġukari ai mo rubu ai

eraka-toġato. Senaġi ġia tu ġia rarana seġukanai Veaġa Lelevaġi Gabuna nuġanai vaġa-sebona moġo eraka-toġato. Benamo ġita eġabivaġi-moġovaġirato rakava ġena seġuka na. <sup>13</sup> Nanigosi ma boromakau rarari ema boromakau natuna variġuna ġegabuato kauna, Rubu Veaġa vereri na vei-rakavai ġemiroto-ġoi tarimari iatari ai misimisiri ġefiu-kaurito-ġoi. Moġesina ġeveirito-ġoi tu tarimarima tauġaniri ġevaġa-veaġarito-ġoi Barau ġoiranai. <sup>14</sup> Senaġi Keriso rarana na moġeri evanaġirito. Korana ġita nuġara, mase ġevaġa-ġoraiani ġauveiri ġerina, eiarevarato, maġuri Barauna ġena vetuġunaġi bitana iaġo-vini ġana. Keriso tu asi vetoukauna ta, tauġena tanu-vanaġivanaġi Iaukana ġenana evevinito Barau ġenai.

<sup>15</sup> Ginitaġo variġuna nuġanai Keriso tu Barau e tarimarima fakari ai eruġani. Korana tu Barau na ekearito tarimari mabarari na ekiraġi-toreato maġuri vanaġivanaġina beġene ġabia. Moġesi nai Keriso emaseto, tovotovona ginitaġona nuġanai tarimarima ġevei-rakavato ġeri rakava na bene ruġa-vaġiri ġana.

<sup>16</sup> Tarima ta roġosi bene mase nuġanai, beurani bene guruġa-fofori, bemaseni nai tu, natuna na ġena farefare bene ġabiri. Mo ura o guruġa-fofori tu fefai betoreani ġia ġena kiraġitore guruġana. Natuna na mo farefare asi roġo beġabirini bene iaġo mo, tamana ġena mase tarimarima ġoirari ai bevaġa-moġoniani vau. <sup>17</sup> Korana tu mo ura ġetoreani fefana tu eguruġa-foforini tarimana bemaseni vau ma ġena seġuka, a bema ġia roġo maġuri tu, mo ura ġetoreani fefana tu asi



seḡukana. <sup>18</sup> Moḡesina nai ginitaḡo giniguinena maki rarana vau evaḡa-seḡukaiato-ḡoi. <sup>19</sup> Korana Mose na taravatu guruḡari mabarari tarimarima ḡeri evarifiu-ḡosiato-ḡoi murinai, boromakau naturi variḡuri e nanigosi rarari eḡabirito-ḡoi, benamo nanu ḡesi egiro-sebonarito-ḡoi. Moḡa murinai isopo legana vulu kakakakana na ḡebaruato dagarana mo rara ma nanunai efereiato-ḡoi. Benamo Mose na mo isopo legana ma vulunai rara tu taravatu bukana e tarimarima iatari ai efu-kaurito-ḡoi. <sup>20</sup> Mose ekirato, “Mai rara tu ginitaḡo vaḡa-moḡonina dagarana Barau na ekiramito boḡono korana-iaḡia.” <sup>21</sup> Farai rubuna ema mo rubu nuḡanai toma-rakariḡo ai ḡeḡauvei-iaḡirito-ḡoi farefareri mabarari iatari ai veḡa sebona eveiato-ḡoi. Iatari ai rara misimisiri efuifiukauto-ḡoi. <sup>22</sup> Moḡoni, taravatu ekirani ilailanai, dori dagara mabarari tu rara na beḡe iarevani. Korana rara asi beriḡoni nai tu, veirakava tuḡamaḡi-fitoḡari maki asiḡina.

<sup>23</sup> Senaḡina maiḡeri mai tu guba dagarari iouiouri moḡo maiḡesi ḡeiarevarini. A gubai korikoriri ḡetanuni dagarari iareva-iarevari ḡana ginitaḡo varevarena tu namona lelevaḡi. Maiḡeri ginitaḡo varevareri evanaḡirini. <sup>24</sup> Korana Keriso tu dia tarimarima na ḡeveiato veaḡa lelevaḡi daiḡutuna nuḡanai eraka-toḡato. Iesu tu guba korikorinai eraka-toḡato. Ma maitoma tu ḡita urarai Barau ḡoiranai efoforini. Mo tarima na ḡeveiato moḡa tu gubai veaḡa lelevaḡi daiḡutuna moḡo ḡevaḡa-ilailaiato. <sup>25</sup> Rubu Veaḡa verena baregona tu laḡani tata nuḡari ai Veaḡa Lel-evaḡi Gabunai rara eḡabi-toḡato-ḡoi. Keriso

moġesina tu asi evevini. Ġia tu dia gubai erakatoġato murinai vau vanaġivanaġi tauġena ginitaġo varevarenai eiaġoni, benamo Barau ġenai evevinini. <sup>26</sup> Moġesina tu tanobara evesinato na veġata bene midigumidigu. Senaġi mai tanobara magona eġabi-iaġoani, mainai vau vaġasebona moġo ema foforito. Mo tu ginitaġo varevarenai evevaġa-iaġoto rakava bene ġabi-veġitari ġana. <sup>27</sup> Evetoreto, tarimarima mabarari tu vaġasebona moġo beġe maseni, ma murinai tu Barau na bevaġa-kotarini. <sup>28</sup> Keriso kavana vaġasebona moġo ginitaġo dagaranai eiaġoto, tarimarima mabarari ġeri rakava bene ġabi-veġitari ġana. Senaġi ġia tu ma bema-fofori ġenoġoini. Mo tu dia rakava ma benema ġabi-vaġiri ġana, senaġina deikara ġia ġenari-taġoani tarimari vaġa-maġuriri ġana.

## 10

### *Ginitaġo guinena na rakava asi beġabi-veġitarini*

<sup>1</sup> Mose ġena taravatu tu dagara namori vau beġe ġorani iouiouri moġo, dia dagara tauri korikori. Ġia na mo ginitaġo dagarari laġani laġani ġevinito-ġoi, senaġina mo ginitaġo dagarari na toma-rakarigġo ġeiaġoto-ġoi tarimari asi evaġa-namo vedaurearito. <sup>2</sup> Bema mo ginitaġo dagarari na ġetoma rakarigġoto-ġoi tarimari beġere vaġa-namo vedaureari nai tu, asi ma beġere ginitaġo-ġenoġoi. Korana ġia tu ġere iareva-moġovaġi, ema ma ġeri vei-rakava guineri mamiraġiri asi ma ġere ġabi-ġenoġoiri. <sup>3</sup> Senaġi mo ginitaġo veġari

laḡani tatai ḡeveirito-ḡoi veiḡari na tu mo laḡani tata nuḡari ai ḡevei-rakavato-ḡoi, moḡeri ḡekiravararito-ḡoi. <sup>4</sup> Korana tu boromakau e nanigosi rarari na rakava tu asi ilaila beḡabi-veḡitarini. <sup>5</sup> Moḡa lorinai Keriso tanobara ḡana eiaḡomato nai tu ekirato,

“Ḡoi tu ginitaḡo dagarari vaḡa-ilailana boromakau, mamoe, nanigosi ema varevare dagarari asi ourani,

senāḡi tauḡani ta ovei-toreato au ḡegu.

<sup>6</sup> Karava na boromakau, mamoe, nanigosi eḡararini,

ema vei-rakava bono ḡabi-vaḡiri ḡana ginitaḡo varevareri ḡeveini ḡeri ai maki asi oiakuni.

<sup>7</sup> Moḡesi naima au akirato,

‘Barau o, au tu iniḡegu,

Buka Veāḡai tu au ḡekiraḡiguto, au baiāḡoma tu ḡoi ḡemu ura bana veia ḡana.’ ”

<sup>8</sup> Keriso ḡena guruḡa giniguinena tu maiḡa, “Ḡoi tu ginitaḡo dagarari e varevare dagarari asi ourani. Karavai ḡegaburini varevareri e vei-rakava bono ḡabi-vaḡiri ḡana ginitaḡo varevareri ḡeveini maki asi oura-vinirini, ema ḡeri ai asi oiakuni.” Maiḡeri veiḡa tu taravatu na ekiraḡirini ilailanai, senāḡi ḡoi na tu asi oiaku-iaḡirini.

<sup>9</sup> Moḡesi nai ma ekirato, “Barau o, au tu iniḡegu, au baiāḡoma tu ḡoi ḡemu ura veiḡana bana veia ḡana.” Benamo ginitaḡo veiḡana giniguinena etore-veḡitaiato, benamo moḡa gabunai tu ta ma evaḡa-ruḡaiato. <sup>10</sup> Benamo Barau ḡena ura lorinai, Iesu Keriso tauḡanina ginitaḡo dagarana

evaḡa-iaḡoato vaḡa-sebona moḡo. Benamo monana ḡita evaḡa-veaḡarato.

<sup>11</sup> Rubu Veḡa vereri mabarari ḡaro vanaḡivanaḡi tata ḡeruḡa-tarito-ḡoi, benamo mo ginitaḡo ḡauveiri ḡeveirito-ḡoi. Senaḡi ḡeri ginitaḡo dagarari tu dagara sebori moḡo ḡevinito-ḡoi vanaḡivanaḡi. Ema mo ginitaḡo dagarari na rakava tu asi ḡeḡabi-veḡitarito-ḡoi.

<sup>12</sup> Senaḡi Keriso na rakava ḡabivaḡiri ḡana tu ginitaḡo sebona moḡo eveiato ḡaro mabarari ḡana. Benamo moḡa murinai Barau ḡimana aroribanai ea tanu-tarito. <sup>13</sup> Mo negai beiaḡoma maitoma tu evenarini, beiaḡoni mo, ḡia ḡevetari-viniani tarimari mabarari Barau na ḡia kwakuna fanakauna dagarana betore-taririni. <sup>14</sup> Korana ginitaḡo dagarana sebona na moḡo evaḡa-veaḡarito tarimari evaḡa-namo vedaurearito. Ma ḡia tu namo vedaurea beḡe tanuni, vanaḡivanaḡi.

<sup>15</sup> Iauka Veḡa na maki evaḡa-ribarani. Guine tu ekirato,

<sup>16</sup> “Vereḡauka ekirani,

‘Moḡeri ḡaro muriri ai,

au ḡia ḡeri tu mai ginitaḡo baveiani.

Au ḡegu taravatu ḡia nuḡari ai batore-toḡarini, ema ḡia debari ai baberarini.’ ”

<sup>17</sup> Ema ma ekirato,

“Ḗia ḡeri vei-rakava e veḡa ḡeḡevaḡeḡevari asi ma batuḡamaḡi-ḡenoḡoirini.”

<sup>18</sup> Maiḡeri etuḡamaḡi-fitoḡarito nai tu, rakava ḡabi-veḡitari ḡana varevare dagarana ta tu asiḡina maia.

*Barau sevina ġana siraka-kavi ma tuġamaġi kokorera ġesi*

<sup>19</sup> Moġa lorinai, tarikakagu, ġita tu nuġara gwaġiġi Iesu rarana ġenana Veaġa Lelevaġi Gabunai bita raka-toġani. <sup>20</sup> Mo vekouġau dabuġana o ketin evedare-kikimato, monana Keriso na ġita ġera maġuri dabarana variġuna ekeo-fakaiato. Mo vekouġau dabuġana tu Keriso tauġanina. <sup>21</sup> Ġita tu ma ġera Rubu Veaġa verena baregona, Barau ġena numa eġita-taġoani. <sup>22</sup> Ġita nuġara tu eiarevarito rakava mamiraġiri ġerina, ema tauġanira maki nanu namo vedaureana na eġuriġirito. Moġesi naima Barau ġenai siraka-kavinaġi nuġara ma moġoniri ġesi e ma ġera veġabidadama korikoriri ġesi. <sup>23</sup> Ġera tuġamaġikau tavaġa-moġoniani dagarana ġenai tana veġabi-gigitari, asi tana ġareva-ġareva. Korana Barau na kara ekiraġi-toreato tu beveiani. <sup>24</sup> Ema karora bitana tuġamaġiri kamasi tata bita vaġa-kavarini, benamo beġe veura-vinini, ema ġauvei namori beġe veini. <sup>25</sup> Ġita ġera raka-vegogo ai bitana fofori-ġoi, asi bitana tanu, tari ġeveini kavana. Senaġi karora ġesi velaunaġi bitana vaġa-baregoa. Korana tu tauġemi na varau ġoġitaiani, Keriso ġena iaġoma ġarona tu mai ekavinaġi-rakavani.

<sup>26</sup> Bema guruġa moġonina taribaiani murinai, ma taġiġiraġeni, benamo tavei-rakavani nai tu, bitana riba, rakava ġabi-veġitari ġana, ginitaġo dagarana ta tu asiġina maia. <sup>27</sup> Senaġi ma garira ġesi kara ġoirai ġerai beġorani, moġa moġo bitana nari-taġoa. Mo tu Barau ġena Kota Baregona,

ema Barau ġevetari-viniani tarimari e iaukari beġararini karavana. <sup>28</sup> Tarima ta na Mose ġena taravatu asi ekorana-iaġiato-ġoi, benamo ġeġita-kauato-ġoi tarimari ruarua o toitoi na ġekiraġi-foforiato-ġoi. Mo tarima tu ġevaġi-maseato-ġoi, asi ġevetuġa-ġwaiato-ġoi. <sup>29</sup> Ġomi ġotuġamaġini, Barau Natuna deikara na kwakuna fanakauna daganai evaġa-iaġoani tarimana tu kamasi? Mai tarima tu rakava voina baregona beġabiani. Ġia na tu mo ginitaġo rarana, ġia evaġa-veaġaiato daganana, asi veaġa raranai evaġa-iaġoani. Ema varevare-bara Iaukana ġenai maki veiġa rakava kwaikwaina eveiani. <sup>30</sup> Korana ġita ma ribara Barau ekirato, “Rakava voina tu au na bavaġa-voiani, au na bavini-ġenoġoiani.” Ema ma ekirato, “Vereġauka na ġena tarimarima beġita-viriġirini.” <sup>31</sup> Maġuri Barauna ġimanai boketo-raġeni tu garina maki asikeikeina.

<sup>32</sup> Ġaro guineri ġotuġamaġi-ġenoġoiri. Barau ġena mama ġoġabiato murinai, midigumidigu barego ġodoġarito, senaġi ġoruġa-gigitarito. <sup>33</sup> Negatari ai tu ġutuma bara ġoirari ai ġevaġa-maiakamito-ġoi, ma ġevaġa-midigu midigumito-ġoi. Ema negatari ai tu ġomi kavana ġevaġa-midigu midigurito-ġoi tarimari seviri ai ġoruġa-tarito-ġoi, ġoruġa-duku dukurito-ġoi. <sup>34</sup> Ġediburarito tarimari ġesi ġomidigumidigu sebonato-ġoi, ema ġemi farefare ġeverarimito-ġoi maki ġoiaku-iaġirito-ġoi moġo. Korana ma ribami, ġomi tu ma ġemi farefare namori, beġe tanu-vanaġi vanaġini dagarari.

<sup>35</sup> Moġa lorinai ġemi tuġamaġi kokore maniġa

asi boĝono fitoĝari. Korana maniĝa voina tu barego lelevaĝina boĝoa ĝabiani. <sup>36</sup> Boĝono vevaĝa-gwaĝigi, korana Barau ĝena ura veiĝana boĝo vaĝa-koriani murinai tu, kara ekiraĝi-toreato mabarana boĝo ĝabiani. <sup>37</sup> Korana Buka Veaĝa ekirani,

“Nega tu misina moĝo,

ma beiaĝomani etoni tarimana tu beiaĝomani, asi bekwaiboni.

<sup>38</sup> Au ĝegu vei-iobukaiobuka tarimana tu ĝena veĝabidadama lorinai bemaĝurini.

Senagi murina ĝana ma beraka-ĝenoĝoini nai, au tu asi baiakuni ĝia ĝenai.”

<sup>39</sup> Senagi ĝita tu murira ĝana asi ma bita raka-ĝenoĝoini, benamo bita rekwarekwani. Asigina, ĝita tu ma ĝera veĝabidadama, be maĝuri bita ĝabiani.

## 11

### *Veĝabidadama tarimari*

<sup>1</sup> Veĝabidadama anina tu mai-ĝesi. Tatuĝamaĝi-dadamaĝirini dagarari tavaĝa-moĝoni korikoririni. Matarai roĝosi bitana ĝitari, senagina tavaĝa-moĝoni korikoririni, moĝeri dagara tu moĝoni ema bita ĝabirini. <sup>2</sup> Sene tarimari tu ĝeri veĝabidadama lorinai, Barau na eĝabi-raĝerito.

<sup>3</sup> Taveĝabidadamani lorinai taribani, Barau eguruĝato, benamo guba e tanobara evetoreto. Moĝa lorinai mai taĝitarini dagarari tu Barau na asi taĝitarini dagarari ĝerina eveirito.

<sup>4</sup> Abela tu ma ġena veġabidadama Barau ġenai lorinai, Barau eviniato varevare dagarana na Kaino ġena varevare dagarana evanaġiato. E ma ġena veġabidadama lorinai, Barau na ġena varevare dagarana ekiraġiato varevare namona ema Barau na evaġa-moġoniato ġia tu vei-iobukaiobuka tarimana. Ma Abela tu varau emaseto, senaġina ġena veġabidadama lorinai roġo eguruġani.

*Abela, Enoka, Noa*

<sup>5</sup> Enoka ma ġena veġabidadama lorinai, Barau na eġabi-varaġeato moġo, asi emaseto. Ma tarimarima na maki asi ġedoġariato, korana Barau na eġabi-vaġiato. Roġosi bene ġabi-veġitaia nuġanai, Barau ġena bukai ekirani, Enoka na Barau iauna evaġa-iakuato. <sup>6</sup> Asi ġena veġabidadama tarimana na Barau tu asiġina ġinavaġi bevaġa-iakuani. Korana deikara Barau ġenai eiaġomani tarimana tu bene vaġa-moġoni Barau tu maġuri etanuni. Ema Barau ġevetauani tarimari mabarari tu voiri namori Barau na bevinirini.

<sup>7</sup> Noa ma ġena veġabidadama lorinai, Barau na ġoirai beġe ġorani dagarari ekira-toreġauato. Mo tu Noa na roġosi bene ġitari dagarari. Noa na Barau evaġa-moġoniato, benamo ma garina ġesi bouti ta eragaiato, ġaraġona e natuna bene vaġa-maġuriri ġana. Ġia ġena veġabidadama na tano-bara tarimari ekiraġi-foforirini rakava tarimari. Ma ġia tu ġena veġabidadama lorinai Barau na ekiraiato vei-iobukaiobuka tarimana. Mai vei-iobukaiobuka tu veġabidadama ġenana eiaġomani dagarana.



*Aberahamo*

<sup>8</sup> Aberahamo ma ġena veġabidadama lorinai, Barau na ekeaiato nai eseġaġiato. Barau na ekeaiato tu ġena vanuġa bene raga-kwanea, ma Barau na tanobara ta ma beviniani, mo ġana bene iaġo. Benamo Aberahamo eraka-rosito moġo, asi ribana aiġana eiaġoni senaġi eiaġoto moġo. <sup>9</sup> Ma ġena veġabidadama lorinai, Barau na ekiraġi-toreato tanobaranai ea vanuġato. Ma monai tu noġa moġo tanukau tarimana ta tanobara borunai etanuni kavana. Isako e Iakobo kavana farai numari ai ġetanuto-ġoi. Maiġeri tarima toitoi tu Barau ġena kiraġitore ġeġabiato. <sup>10</sup> Korana Aberahamo tu vanuġa baregona evaġa-nogaġato-ġoi. Mo vanuġa tu fore baregona iatanai beruġakauni. Mo vanuġa tu Barau tauġena na beboioġaiani e beragaiani.

<sup>11</sup> Veġabidadama lorinai Sara na kokore eġabiato bene ġabi ġana, ema eġauka-rakavato, senaġi mero keina evaġa-maġuriato. Ġia ma ribana, Barau na kara ekiraġi-toreato dagarana tu beġorani. <sup>12</sup> Benamo mai tarima sebona eġauka-rakavato, senaġi ġia ġenana senena ġemaġurito tu guba visiġuri kavana vovoka tabutabu, ema kone mirina kavana asi iavi-iavina.

<sup>13</sup> Maiġeri tarimarima mabarari tu veġabidadamai ġetanuto-ġoi nuġanai ġemaseto. Barau na ekiraġi-torerito dagarari ġia na tu asi ġeġabito, senaġi manaġai moġo ġeġita-guinerito, benamo ġeġabi-raġerito. Ema ġeguruġa-foforito ġia tu tanobara boruna tarimari. Ġia mai tanobarai tu ġetanukauni

moĝo. <sup>14</sup> Moĝesina ĝeguruĝani tarimari tu ĝeri guruĝa na ĝevaĝa-foforirini, ĝia tu ĝeri tanobara korikorina ĝevetauani. <sup>15</sup> Bema ĝeraga-kwaneato tanobarana ĝere tuĝamaĝi-ĝenoĝoia nai tu, ma dabara ĝere ĝenoĝoi. <sup>16</sup> Senaĝi ĝia tu tanobara namo vedaureana ĝeuravini-rakavaiato-ĝoi. Mo tu gubai etanuni dagarana. Moĝa lorinai Barau tu asi emaiakaiani, ĝia ĝeri Barau ĝetoni nai, korana Barau na ĝeri vanuĝa baregona ta eraga-toreato.

<sup>17</sup> Aberahamo tu ma ĝena veĝabidadama. Moĝesina nai Barau na etovonaĝiato nai tu, natuna Isako ĝinitaĝo dagaranaĭ evaĝa-iaĝoato, benamo Barau ma evarevare-viniato. Aberahamo ribana, Barau na kiraĝitore tu ĝia eviniato, senaĝina ĝia natuna sebona kwariĝutu moĝo tu ĝinitaĝo dagarana ĝana bene vaĝia etato. <sup>18</sup> Barau na Aberahamo maki maiĝesina ekiraiato, ekirato, “Isako ĝenana moĝo ĝoi senemu beĝe maĝurini.” <sup>19</sup> Aberahamo etuĝamaĝito tu Barau na Isako ma bevaĝa-maĝuri ĝenoĝoiani riba. Moĝesina naima iniĝesina ma sikiraĝia: Aberahamo na Isako mase na eĝabi-ĝenoĝoiato.

### *Isako, Iakobo, Iosefa*

<sup>20</sup> Isako ma ĝena veĝabidadama lorinai, Iakobo e Esau evaĝa-namorito, ema ĝeri ai vau beĝea ĝorani dagarari ekiraĝirito.

<sup>21</sup> Iakobo ma ĝena veĝabidadama lorinai, dori emaseto-ĝoi nuĝanai tu Iosefa natuna ruarua evaĝa-namorito, ema ĝena togoi ĝenai eveĝabiritoĝoto, benamo Barau etoma-rakariĝo viniato.

<sup>22</sup> Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Isaraela tarimari Aigupito na beġe raka-vaġini ekiraġiato, ema turiġana kamasi beġene veia guruġana evinirito.

### *Mose*

<sup>23</sup> Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaiato mero keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

<sup>24</sup> Mose ma ġena veġabidadama lorinai, ebaregoto nai tu asi eurato beġene kira, ġia tu Pharao natuna ġuiatona natuna merona. <sup>25</sup> Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo. <sup>26</sup> Ġia na etuġamaġiato tu, Keriso uranai beġe vaġa-maiakaiani voina tu barego lelevaġi, Aigupito ai farefare voiri bevanaġirini. Korana ġia tu eboġeguine-iaġoto, ġoirai voina eġita-iaġoato.

<sup>27</sup> Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi egarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato. <sup>28</sup> Ma ġena veġabidadama lorinai, Rubu Veaġa verekona ekorana-iaġiato ema Isaraela tarimari ekirarito, rara ġeri ġatama-boka koberi murikari ai beġene

dau. Benamo mase aneruna na naturi, ġemaġuri-  
guineto merori, asi bene vaġiri.

*Isaraela tarimari na Barau ġeġabidadama-  
viniato*

<sup>29</sup> Isaraela tarimari na Barau ġeġabidadama-  
viniato lorinai, Davara Kakakakana nuġana  
na tanobara kaukauna na noġa moġo ġeraka-  
vanaġito. Ma Aigupito tarimari maki ġevanaġi  
ġetato nai tu, davara na eġutu-ġaurito.

<sup>30</sup> Isaraela tarimari ma ġeri veġabidadama lori-  
nai, Ieriko vanuġa maġuna ġaro vaġa-imaime ru-  
arua (7) ġeraka-ġeġeraġiato murinai eketoto.

<sup>31</sup> Mata-boraġa ġuiatona Rahaba Barau ġenai  
eveġabidadamato lorinai, Isaraela ġeri mara-  
mara tarimari eġabi-raġerito, benamo Barau  
ġeseġafore-viniato-ġoi tarimari ġesi asi ġevaġi-  
sebonaiato.

<sup>32</sup> Ma kara ma bakiraġiani? Asi ġegu taimi  
Gideona, Barak, Samson, Iefeta, Davida, Samuela  
ema peroveta tarimari variri bakiraġirini. <sup>33</sup> Ġia  
tu ma ġeri veġabidadama lorinai, tanobara  
basileiari ġevetari-vinirito nai, ġekokoreto-ġoi.  
Veġa iobukaiobukari ġeveito-ġoi, ema kiraġitore  
dagarari ġeġabirito laion bokari ġekou-ġaurito.

<sup>34</sup> Karava seġuka rakava ema-moreni ġevei-  
buserito, ema vetari baġari matari na ġeraga-  
maġurito. Ġeri moiramaira nuġari ai ġekokoreto;  
vetari ai tu guruġari maki seġuka rakava, ema  
ġevetari-vinirito-ġoi doġorori ġevaġa-ketorito-  
ġoi. <sup>35</sup> Ġemaseto-ġoi tarimari ma ġevaġa-  
maġuri ġenoġoirito-ġoi, benamo sinari na ma  
ġeġabi-ġenoġoirito-ġoi. Ma tari tu dibura numai

tauḡaniri ḡekwari-rakava kwaikwairito-ḡoi ma dorī ḡemaseto-ḡoi, senaḡi asi ḡeurato-ḡoi Barau beḡene kira-ḡuniḡaua, benamo dibura numana na beḡene ruḡa-vaḡiri. Korana ḡeri ura tu vaḡa-variḡisi ḡenoḡoi namona beḡene ḡabia.

<sup>36</sup> Ma tari tu ḡevaseva-vaseva iaḡirito-ḡoi, ḡekwaririto-ḡoi, ma tari tu seini na ḡebarurito-ḡoi, benamo dibura numanai ḡetorerito-ḡoi. <sup>37</sup> Fore na ḡetakirito-ḡoi; ma tari tu ḡeso-ḡuturito-ḡoi; ma tari tu vetari baḡari na ḡevaḡirito-ḡoi. Mamoe kefiri e nanigosi kefiri ḡevei-rakaoto-ḡoi, asi ḡeri-ḡari, ḡevaḡa-midigu midigurito-ḡoi, ema tari-marima na veḡa asi namori ḡeri ai ḡevei-vinirito-ḡoi. <sup>38</sup> Tanobara ḡia ḡeri ai tu asi namo moḡo. Tanobara fakari na e ḡoro tuḡuri na, tano kouḡari na, ema guri na ḡetanu-rakaoto-ḡoi.

<sup>39</sup> Maḡeri tarimarima mabarari ḡeri veḡabidadama loriri ai, Barau na evaḡa-maḡuririto. Senaḡina ta na Barau na ekiraḡi-toreato dagarana ta tu asi eḡabiato. <sup>40</sup> Korana Barau na dabara namona ta ḡita ḡera eboioḡaiato. ḡia ḡena ura ḡia maki ḡita ḡesi vaḡa-sebo vau bene vaḡa-namo vedaureara.

## 12

<sup>1</sup> Mo veḡabidadama tarimari, ḡita ḡeḡita-taḡorani tarimari, tu ḡutuma lelevaḡi, magube na noḡa moḡo beḡe ḡeḡeraḡira. Moḡa lorinaḡi ḡita ḡekoukou-ḡaurani dagarari, ema vei-rakava ḡita ḡebarubaru-tarirani dagarari mabarari sifitoḡari. Benamo ma kokorera ḡesi ḡoirarai Barau na etoreato raga-iruirunai siraga. <sup>2</sup> Matara Iesu

ġenai sitore-kauri. Korana Iesu na ġita ġera veġabidadama esinaiato, ema bevaġa-ġuġuruani. Ġia na ġoiranai mo iaku e verere etuġamaġiato nai, satauro maiakana asi etuġamaġiato. Benamo Barau ġena terona aroribanai etanu-tarito.

<sup>3</sup> Iesu situġamaġia. Ġia tu vei-rakava tari-mari na asi ġeġabi-raġeato, ġeseġafore-viniato, senaġina ekokoreto. Moġa lorinai asi boġono tuġamaġi-moira, e asi boġono ruġa-ġuirāġi. <sup>4</sup> Gomi tu rakava ġesi ġovevaġi-tanuni. Senaġina ġomi mani vevaġi nuġanai tu, ta raramu roġosi roġo bere riġo. <sup>5</sup> Ema ġomi tu Barau na ekeamito ġia natuna, senaġi mai velaunaġi guruġana tu ġotuġarekwaiato, ekirato,

“Natugu, Vereġauka na vevaġa-riba veġari gwaġiġiri evinimuni nai,  
asi bono ġabi-meraġari,  
ema bekira-feimuni nai,  
nuġamu asi bono vaġa-moiraia.

<sup>6</sup> Korana Vereġauka na eura-vinirini tarimari tu vevaġa-riba gwaġiġiri evinirini,  
ema ġia natunai evaġa-iaġorini tarimari mabarari tu ekwaririni.”

<sup>7</sup> Moġa lorinai matakani veġari ġemi ai beġe ġorani nai tu boġono kokore. Korana ġomi tu Barau natuna naima moġesina eveimini. Ma siġitaia, kamara mero keina tu tamana na asi evaġa-matakaniani? <sup>8</sup> Tama mabarari na naturi ġevaġa-matakanirini. Ma bema ġomi Barau na asi evaġa-matakanimini, moġa anina ġomi tu dia Barau natuna korikori, ġomi tu gara meromi.

<sup>9</sup> Vaḡa-ilailana tauḡani rekenai ḡita tamara korikoriri na ḡevaḡa-matakanirani, benamo moḡeri korari ai tamara tagubakaurini. Moḡesina kavana namona tu ḡita tata iaukara Tamari Barau maki tana gubakaua, benamo bitana maḡuri. <sup>10</sup> Ḡita tamara na tu ḡaro kotunai moḡo ḡevaḡa-matakanirani. Mo tu ḡia tauḡeri na ḡetuḡamaḡiani namo ḡetoni ḡarori ai moḡo. Senaḡi Barau na evaḡa-matakanirani tu ḡita ḡera namo ḡana, ema ḡia ḡesi bitana veaḡa-vegogo ḡana. <sup>11</sup> Maitoma matakani veiḡari ḡeiaḡomani tu ma midigumidiguri, asi iakuri. Senaḡina murinai vau mo matakani veiḡari ḡerina beribani tarimana tu vei-iobukaiobuka ema maino tarimanai beiaḡoni.

*Nuḡara bitana vaḡa-kokoreri ema bitana ruḡa-gigitari*

<sup>12</sup> Moḡa lorinai ḡimami beḡe ḡeroḡero-riḡo, ḡoḡabi-vaisiri, ema tuimi beḡe moira ḡeḡoḡo-ḡoḡorini, ḡovaḡa-kokoreri. <sup>13</sup> Benamo kwakumi na ḡoraka-iaḡirini fanari ḡovei-roroḡotori, be kwaku rakava tarimana kwakuna asi bene rakava-lelevaḡi, senaḡi bene namo.

<sup>14</sup> Boḡono kokore-korikori, tarimarima mabarari ḡesi maino ai boḡono tanu uranai. Be ḡemi maḡuri beḡene veaḡa e asi vetoukaunai beḡene iaḡo bene. Korana tu ma vetoukauna e asi veaḡa tarimana na Vereḡauka tu asi beḡitaiani. <sup>15</sup> Boḡono venari, be tarima ta Barau ḡena varevare-bara ḡenana asi bene raka-veḡita, ma nuḡa-ḡirima ḡokana nuḡanai asi bene tubu-raḡe. Korana nuḡa-ḡirima ḡokana betubuni, ḡokana

mamakina na ġomi fakami ai rakava bevaġa-  
 ġoraiani, benamo tarimarima vovoka bevaġa-  
 rakavarini Barau ġoiranai. <sup>16</sup> Boġono ġitaia, ta  
 ġomi fakami ai mata-boraġa veiġari asi bene  
 veiri, ema Esau na Barau asi ekorana-iaġiato  
 kavana asi bene vei. Esau na tu ġena maġuri  
 guine seġukana ġaniġani diġu sebona moġo  
 uranai evare-fitoġaiato. <sup>17</sup> Moġa murinai ġomi  
 ma ribami, mo maġuri guine vevaġa-namona  
 tamana ġenana neġabia etato tu tamana na  
 asi eġabi-raġeato. Moġoni, tamana ma taġina  
 ġesi enoġiato, senaġi tamana asi ma etuġamaġi-  
 ġenoġoito.

<sup>18</sup> Ġomi tu dia ġimami na boġo ġabi-karaiani  
 ġorona ġana boġo iaġoma, Israela tarimari  
 kavana. Ġia tu Sinai Ġorona sevina korikorinai  
 ġeruġato, benamo karava emoreto ġeġitaato,  
 ema mukuna dubara kiukiuna e iavara barego  
 lelevaġina; <sup>19</sup> ema kibi guruna asikeikeina  
 eraġeto e garo baregona eguruġato ġeseġaġirito.  
 Israela tarimari na mo garo ġeseġaġiato nai tu,  
 Mose ġenoġiato mo garo na asi ma bene vaġa-  
 guruġari. <sup>20</sup> Korana Barau na taravatu guruġari  
 evinirito nai tu, ġegari-rakavato, Barau tu ekirato,  
 “Bema tarima ta na o boromakau ta o nanigosi  
 ta na mo ġoro bea vei-karaiani nai tu, fore na  
 boġono taki-masea.” <sup>21</sup> Moġeri vetoġa ġefoforito  
 gariri tu asikeikeiri, benamo Mose ekirato, “Au  
 tu eġoġo-ġoġoguni, agari-rakava rakavani.”

<sup>22</sup> Senaġina ġomi tu Siona Ġorona ġana boġo  
 iaġoma e guba Ierusalemna maġuri Barauna  
 ġena vanuġa baregona ġana, ema aneru ġutuma



gorogoro asi iavi-iaviri ġeri ai boġo iaġoma. <sup>23</sup> Ġomi tu vegogo baregona ġena e Barau natuna ġemaġuri-ġuineto ekalesiari ġeri ai boġo iaġoma. Ġia arari tu Barau na gubai etorerito. Ema ġomi tu tarimarima mabarari Kotai beġita-viriġirini Barauna ġenai e vei-iobukaiobuka tarimari iaukari, Barau na evaġa-namo vedaurearito iaukari, ġeri ai boġo iaġoma. <sup>24</sup> Ema Iesu ġenai boġo iaġoma. Iesu ġinitaġo variġunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu ġomi ġemi ai eke-tokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

<sup>25</sup> Boġono venari, Barau na evaġa-guruġamini nai, ġarona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Ġeri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini. <sup>26</sup> Moġeri ġaro ai Barau ġarona na tanobara eruku-iagaiagaiato. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.” <sup>27</sup> Mai guruġa “vaġa-sebona maia” anina tu, ġuinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

<sup>28</sup> Ĝita na taĝabiani basileiana tu asi beĝareva-  
ĝarevani. Moĝa lorinai Barau sitanikiu-vinia,  
ema Barau na eura-viniani maĝurinai sitoma-  
rakariĝo vinia ma vegubakaura e ma garira ĝesi.  
<sup>29</sup> Korana ĝita ĝera Barau tu karava ĝaraĝara.

## 13

### *Barau vaĝa-iakuna veĝari*

<sup>1</sup> Ĝomi fakami ai tarikaka veuravinina bene  
tanu-vanaĝi vanaĝi. <sup>2</sup> Tarima boruri ĝabiraĝeri  
asi boĝono tuĝa-rekwaia, korana tarima tari  
maniĝesi ĝeveito-ĝoi nai tu, aneru ĝeĝabi-  
raĝerito. Senaĝi ĝia tu asi ĝeriba-maoroto mo  
tu aneru ĝeĝabi-raĝerini.

<sup>3</sup> Dibura numanai ĝetanuni tarimari boĝono  
tuĝamaĝiri. Boĝono tuĝamaĝi, ĝomi maki ĝia ĝesi  
dibura numanai ĝoro tanu-vegogo. Ema ĝevaĝa-  
midigu midigurini tarimari boĝono tuĝamaĝiri.  
Boĝono tuĝamaĝi ĝomi maki ĝere vaĝa-midigu  
midigumi.

<sup>4</sup> Tarimarima mabarari na veĝaraĝo beĝene  
gubakaua, ema veĝaraĝo tarimari ĝeri gena-  
gena gabuna bene namo-vedaurea. Korana  
ma ĝaraĝona, senaĝina ekima-rakaoni, o ma  
eveĝaraĝo-sirivaĝini tarimana, ema mata-boraĝa  
veĝari ĝeveini tarimari mabarari tu Barau na ĝeri  
rakava voiri bevinirini.

<sup>5</sup> Moni asi boĝono uravini-lelevaĝiri. Kara  
dagara ĝemi ai maniĝeri boĝono ĝabi-raĝeri ma  
iakumi ĝesi. Boĝono kira, mai dagara ĝemai  
maĝeri tu ĝemai ilaila. Korana Barau tu ekirato,  
“Au na asiĝina ĝinavaĝi baraga-kwanemini,

ema ġereġami asiġina ġinavaġi baiaġuimini.”

<sup>6</sup> Moġa lorinai nuġara ma kokoreri ġesi bitana kira,

“Vereġauka na au bevaġa-kavaguni,

be au asi bagarini.

Tarimarima na tu kara beġe veiani au ġegu ai?”

<sup>7</sup> Ġotuġamaġi-ġenoġoi, ġeguine-iaġimito-ġoi tarimari ġotuġamaġiri. Ġia na Barau ġena guruġa ġemi ġekiraġito. Ġia ġeri maġuri na kara ġefoforito eiaġoto mo ġea maseto boġono tuġamaġiri, ema ġia ġeri veġabidadama boġono tovotovori.

<sup>8</sup> Iesu Keriso tu ġoraġani, toma, ema vanaġivanaġi asi beirauni. <sup>9</sup> Vevaġa-riba irauirauri na dabara moġonina na asi beġene ġori-veġitami. Namona tu Barau ġena varevarebara na ġita iaukara bene vaġa-kokoreri. Ġaniġani taravaturi irauirauri na ġita iaukara tu asi beġe vaġa-kokorerini. Moġeri taravatu ġekorana-iaġirito-ġoi tarimari tu namo ta asi ġeġoitaġoato.

<sup>10</sup> Ġita tu ma ġera fata veaġana. Senaġina Barau toma-rakariġona ġana farai rubuna nuġanai ġinitaġo ġauveiri ġeveito-ġoi tarimari tu mai fatai asi beġe ġaniġanini. <sup>11</sup> Rubu Veaġa verena baregona na boromakau, nanigosi, mamoe evaġirito-ġoi nai, tauġaniri tu eġabi-rosirito-ġoi Isaraela tarimari ġeri totoġa gabuna na, benamo murikai vau ea gaburito-ġoi. Rarari moġo Veaġa Lelevaġi Gabunai eġabi-toġarito-ġoi, rakava ġabiveġitari varevarena bene vei-iaġiri ġana. <sup>12</sup> Moġesina naima Iesu maki rarana na tarimarima bene vaġa-veaġari ġana tu, Ierusalemata vanuġa barana

maḡuna murikanai emidigu-midiguto. <sup>13</sup> Moḡa lorinai ḡita maki Iesu ḡenai totoḡa murikana ḡana siraka-rosi. Be, ḡia na eḡabiato maiakana ḡita na maki bitana ḡabia. <sup>14</sup> Korana mainai ḡita tu asi ḡera tanu-vanaḡivanāḡi vanuḡana. A ḡita tu vanuḡa vau ma beiḡomani dagarana tavetauani. <sup>15</sup> Moḡa lorinai vanaḡivanāḡi Barau vonevone-raḡena varevareri Iesu ḡenana bitana vini-raḡea Barau ḡenai. Barau arana vonevone-raḡena tu ḡita murura ḡwaḡwana. <sup>16</sup> Veiḡa namori veiveiri asi boḡono tuḡa-rekwari, ema ḡemi ai guruḡa moḡoniri maniḡeri karomi ḡeri maki boḡono kiraḡi. Korana tu maniḡesina veiḡari tu ginitaḡo dagarari namori Barau na eiaku-iaḡirini.

<sup>17</sup> Ḣeguine-iaḡimini tarimari garori boḡono seḡaḡiri, ema ḡeri veḡorikau maorona gaburenai boḡono tanu. Korana ḡia na tu ḡomi ḡemi maḡuri ḡeḡita-ḡaurini, ema ḡomi ḡemi maḡuri aiḡesina Barau ḡenai beḡea kiraḡirini. Garori boḡono seḡaḡiri, be ma iakuri ḡesi ḡeri ḡauvei beḡene veia, a dia nuḡari ma metori ḡesi. Korana bema nuḡari ma metori ḡesi ḡomi beḡe narimini nai tu, ḡomi na namo ta asi boḡo doḡariani.

<sup>18</sup> Ḣema boḡono ḡuriḡuri. Ḣai ribama ḡai nuḡama tu veiareva Barau ḡoiranai, ema ḡema ura barana tu vegubakau ai moḡo baḡana tanu. <sup>19</sup> Ḣegu noḡinoḡi barego lelevaḡina ḡomi ḡemi ai tu boḡono ḡauḡau, be ḡemi ai ma bana ḡenoḡoi-ḡariḡari.

<sup>20</sup> Maino Barauna na ḡera Vereḡauka Iesu tu betanu-vanaḡi vanaḡini ginitaḡo rarana ḡenana ma evaḡa-maḡuri ḡenoḡoiato. Iesu tu mamoe nari

tarimana baregona. <sup>21</sup> Mai maino Barauna na dagara namori mabarari bene vinimi, ġena ura boġono veia ġana. Ema kara ġia na eiaku-iaġirini dagarari Iesu Keriso ġenana ġita nuġarai bene ġauvei-iaġiri. Mareva baregona tu ġia ġena bene iaġo mo vanaġivanāġi. Amen.

<sup>22</sup> Tarikakagu mabarami, anoġimini, ġegu vevaġa-naġi guruġari maiġeri boġono ġabi-raġeri ma nuġami namori ġesi; korana fefa tu kubina moġo batorea. <sup>23</sup> Au aurani navaġa-ribami, ġita tarikakara Timoteo tu dibura numana na beġe tuġu-vaġia. Bema ġia bema raġasi-ġarimoġini tu, tauma ruarua baġa iaġosini ġitaġitami.

<sup>24</sup> Ġema vevaġa-namo ġemi veġorikau tarimari ema Barau ġena tarimarima veaġari mabarari boġono viniri. Itali tarimari na maki ġemi vevaġa-namo beġe tuġu.

<sup>25</sup> Barau ġena namo e varevare-bara mabarami ġemi ai bene tanu.

**GINITAŌ VARIŪUNA**  
**The New Testament in the Sinaugoro Language of**  
**Papua New Guinea**  
**Nupela Testamen long tokples Sinaugoro long Niugini**  
Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 11 Nov 2022 from source files dated 22 Nov 2019  
a998e4ce-f2f7-5577-968e-5d2feef358f1